

## **“Službene novine Kantona Sarajevo”, broj 30/08**

Na osnovu člana 18 b) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04) i člana 5. tač. 2. i 5. Zakona o državnoj službi u Federaciji Bosne i Hercegovine ("Službene novine Federacije BiH", broj 29/03, 23/04, 39/04, 54/04, 67/05 i 8/06), Skupština Kantona Sarajevo, na sjednici održanoj 4. septembra 2008. godine, donijela je

### **ZAKON O RADNO-PRAVNOM STATUSU ČLANOVA VLADE KANTONA SARAJEVO**

#### **I. OSNOVNE ODREDBE**

##### **Član 1.**

(Sadržaj Zakona)

- (1) Ovim zakonom uređuje se radno-pravni status članova Vlade Kantona Sarajevo (u daljnjem tekstu: Vlada), koji se odnosi na plaće, naknade i druga prava iz radnog odnosa.
- (2) Ovim zakonom utvrđuju se i plaće savjetnika članova Vlade Kantona Sarajevo, a na pitanje naknada i drugih prava savjetnika koja nisu regulisana ovim zakonom, primjenjuju se propisi kojima se uređuju prava državnih službenika u organima državne službe u Federaciji Bosne i Hercegovine (u daljnjem tekstu: Federacija), opći propisi o radu i kolektivni ugovori.

##### **Član 2.**

(Primjena drugih propisa)

Na prava i obaveze koje se odnose na radno-pravni status članova Vlade, koja nisu uređena ovim zakonom, primjenjuju se propisi kojima se uređuju prava državnih službenika u organima državne službe u Federaciji, opći propisi o radu i kolektivni ugovori.

##### **Član 3.**

(Period ostvarivanja prava)

- (1) Prava utvrđena ovim zakonom, članovi Vlade ostvaruju za vrijeme trajanja svog mandata.
- (2) Savjetnik ostvaruje prava utvrđena ovim zakonom najduže za period mandata člana Vlade čiji je savjetnik.

#### **II. PRAVO NA PLAĆU, NAKNADU PLAĆE I DRUGA MATERIJALNA PRAVA**

##### **Član 4.**

(Plaća)

- (1) Članovi Vlade i savjetnici imaju pravo na plaću.
- (2) Članovi Vlade pravo na plaću ostvaruju od dana potvrđivanja imenovanja na Skupštini Kantona Sarajevo (u daljnjem tekstu: Skupština).
- (3) Savjetnici pravo na plaću ostvaruju od dana imenovanja na položaj.

##### **Član 5.**

(Način utvrđivanja plaće)

Plaća se utvrđuje množenjem polazne osnove za obračun plaća koja se primjenjuje na državne službenike u kantonalnim organima, s utvrđenim koeficijentom za utvrđivanje plaće i tako utvrđeni iznos uvećava se za 0,6% za svaku započetu godinu radnog staža, a najviše do 20%.

##### **Član 6.**

(Koeficijenti za utvrđivanje plaće i položajni dodatak)

- (1) Koeficijent za utvrđivanje plaće članovima Vlade i savjetnicima utvrđuje Komisija za izbor, imenovanja i administrativna pitanja Skupštine (u daljnjem tekstu: Komisija), prema značaju dužnosti koju obavljaju.
- (2) Premijeru Kantona i članovima Vlade pripada pravo na položajni dodatak, u iznosu do 20% od njihove plaće, zavisno od značaja dužnosti koju obavljaju.

(3) Visinu položajnog dodatka iz stava (2) ovog člana, utvrđuje Komisija.

#### Član 7.

(Naknada plaće zbog bolesti ili povrede)

- (1) Članovi Vlade i savjetnici imaju pravo na naknadu plaće u visini plaće koju su ostvarili za prethodni mjesec, za prvih 30 dana odsustva sa posla zbog bolesti ili povrede.
- (2) Članovi Vlade i savjetnici imaju pravo na naknadu plaće u visini od 90% plaće koju su ostvarili za prethodni mjesec prije odsustva sa posla zbog bolesti ili povrede, za odsustvo sa posla duže od 30 dana.
- (3) Članovi Vlade i savjetnici imaju pravo na naknadu plaće u punom iznosu, koju su ostvarili za prethodni mjesec, ako je do odsustva sa posla došlo zbog povrede na radu.

#### Član 8.

(Naknada plaće nakon prestanka javne funkcije)

Članovi Vlade, nakon prestanka javne funkcije, a do početka ostvarivanja plaće po drugom osnovu ili do ispunjavanja uslova za penziju, imaju:

- a) sa radnim stažom do pet godina, tri mjeseca naknadu plaće koju su ostvarivali dok su bili na javnoj funkciji, a sljedećih devet mjeseci 50% od te plaće;
- b) sa radnim stažom od pet do 15 godina, šest mjeseci naknadu plaće koju su ostvarivali dok su bili na javnoj funkciji, a sljedećih šest mjeseci 50% od te plaće;
- c) sa radnim stažom od 15 do 25 godina, devet mjeseci naknadu plaće koju su ostvarivali dok su bili na javnoj funkciji, a sljedeća tri mjeseca 50% od te plaće;
- d) sa radnim stažom preko 25 godina, 12 mjeseci naknadu plaće koju su ostvarivali dok su bili na javnoj funkciji.

#### Član 9.

(Pravo na naknadu troškova za službeno putovanje)

- (1) Članovi Vlade, upućeni na službeno putovanje, imaju pravo na naknadu troškova dnevnice, noćenja, prevoza i ostalih izdataka nastalih u vezi sa službenim putovanjem.
- (2) Službenim putovanjem, u smislu ovog zakona, smatra se obavljanje poslova izvan Kantona Sarajeva (u daljnjem tekstu: Kanton).

#### Član 10.

(Donošenje odluke o odobrenju službenog putovanja)

- (1) Putni nalog članovima Vlade izdaje sekretar ministarstva, a odluku o odobrenju službenog putovanja donosi premijer Kantona.
- (2) Putni nalog premijeru Kantona izdaje sekretar Vlade, a odluku o odobrenju službenog putovanja donosi predsjedavajući Skupštine.

#### Član 11.

(Dnevnicu i troškovi noćenja)

- (1) Dnevnicu za službeno putovanje u zemlji, bez troškova noćenja, utvrđuje se u visini od 10% prosječne mjesečne isplaćene neto plaće po zaposlenom u privredi u Federaciji, za prethodna tri mjeseca.
- (2) Visina dnevnice za službeno putovanje u inostranstvo, za svaku stranu zemlju pojedinačno, utvrđuje se u skladu sa posebnim aktom Vlade Federacije.
- (3) Visinu dnevnice iz stava (1) ovog člana i procenat uvećanja dnevnice iz st. (1) i (2) ovog člana, za pojedine nosioce funkcija iz ovog zakona, utvrđuje Komisija posebnim aktom.
- (4) Troškovi noćenja priznaju se na osnovu računa, do visine cijena noćenja u hotelu "A" kategorije u mjestu noćenja.
- (5) Članovi Vlade imaju pravo na naknadu troškova smještaja na osnovu računa za korištenje hotela iznad "A" kategorije, u slučaju kada u svojstvu člana delegacije učestvuju na međunarodnim skupovima na kojima organizator odnosno domaćin određuje uslove smještaja.

#### Član 12.

(Isplata dnevnica)

Za službeno putovanje koje traje od 8 do 12 sati isplaćuje se polovina dnevnice, a za službeno putovanje koje traje od 12 do 24 sata isplaćuje se puna dnevnicu.

### Član 13.

#### (Dnevnice za inostranstvo)

- (1) Dnevnice za inostranstvo obračunavaju se od sata prelaska granice Bosne i Hercegovine u polasku i do sata prelaska granice Bosne i Hercegovine u povratku sa službenog puta.
- (2) Ako se za službeno putovanje koristi avion, dnevnicu se obračunava od sata polijetanja aviona sa aerodroma u Bosni i Hercegovini, do sata slijetanja na aerodrom u Bosni i Hercegovini, na kojem je izvršen carinski pregled.
- (3) Ako službeni put uključuje posjetu više zemalja, u odlasku se obračunava dnevnicu utvrđena za stranu državu u kojoj se počinje službeno putovanje, a u povratku dnevnicu za stranu državu u kojoj je službeno putovanje završeno.

### Član 14.

#### (Naknada ostalih izdataka)

- (1) Članovi Vlade imaju pravo na naknadu ostalih izdataka koji nastaju u vezi sa službenim putovanjem kao što su: izdaci za pribavljanje putne isprave, osiguranje, vakcinisanje, ljekarski pregled, službena pošta, takse, troškovi telefona i telefaksa, obrada materijala na računaru po prepisu ili diktatu i druge usluge, u skladu sa ovim zakonom.
- (2) Izdaci iz stava (1) ovog člana obračunavaju se prema priloženim računima.

### Član 15.

#### (Akontacija)

- (1) Na osnovu putnog naloga, članovi Vlade mogu dobiti akontaciju u visini procijenjenih troškova.
- (2) Akontacija se utvrđuje tako što se izdatak za ishranu utvrđuje na osnovu dnevnice, a ostali izdaci na osnovu procijenjenih troškova.
- (3) Izdaci za službeno putovanje priznaju se na osnovu obračunatih putnih troškova, koji se u roku od pet dana od dana kada je službeno putovanje završeno, podnose uz pisani izvještaj koji je ovjerio naredbodavac. Uz, obračun putnih troškova prilaže se nalog za službeno putovanje, odgovarajući dokaz (račun) za upotrebu prevoznog sredstva, hotelski račun, kao i drugi dokazi o troškovima.

### Član 16.

#### (Naknada za ishranu za vrijeme rada-topli obrok)

- (1) Članovi Vlade, imaju pravo na naknadu troškova ishrane (topli obrok) u visini od 2% prosječne plaće isplaćene u Federaciji prema posljednjem objavljenom podatku Federalnog zavoda za statistiku.
- (2) Naknada iz stava (1) ovog člana ne obračunava se za vrijeme odsustvovanja sa posla po osnovu službenog puta, bolovanja, godišnjeg odmora ili drugog odsustvovanja.

### Član 17.

#### (Naknada za regres za godišnji odmor)

Članovi Vlade, imaju pravo na regres za godišnji odmor, u iznosu utvrđenom aktima Vlade Federacije za državne službenike.

### Član 18.

#### (Naknada za slučaj smrti, teške invalidnosti ili teške bolesti)

Naknadu za slučaj smrti, teške invalidnosti i bolesti, članovi Vlade ostvaruju na način i pod uslovima utvrđenim aktima Vlade Federacije za državne službenike.

### Član 19.

#### (Otpremnina za odlazak u penziju)

Članovi Vlade imaju pravo na isplatu otpremnine prilikom odlaska u penziju, u iznosu od šest njihovih plaća isplaćenih u prethodnih šest mjeseci.

### Član 20.

#### (Ostale naknade)

Članovi Vlade imaju pravo na troškove reprezentacije, troškove mobilnog telefona i na upotrebu službenog automobila, u visini i na način koji svojim aktom utvrđuje Vlada.

### III. DRUGA PRAVA ČLANOVA VLADE I SAVJETNIKA

#### Član 21.

(Radni staž i socijalno osiguranje)

- (1) Članovima Vlade i savjetnicima, vrijeme provedeno na radu, u smislu ovog zakona, uračunava se u radni staž.
- (2) Radi ostvarivanja prava iz radnog odnosa, lica iz stava (1) ovog člana, članovi Vlade i savjetnici dužni su Stručnoj službi za zajedničke poslove, dostaviti radnu knjižicu i druge personalne dokumente, u roku od 30 dana, od dana stupanja na dužnost.

#### Član 22.

(Zdravstvena zaštita)

Za vrijeme provedeno na radu, članovi Vlade i savjetnici, ostvaruju prava iz radnog odnosa kao i pravo na zdravstvenu zaštitu i zdravstvenu zaštitu članova svoje porodice, u skladu sa općim propisima.

#### Član 23.

(Godišnji odmor)

Članovi Vlade i savjetnici, imaju pravo na korištenje godišnjeg odmora, na način i pod uvjetima predviđenim za državne službenike, a kriterije za utvrđivanje trajanja godišnjeg odmora utvrđuje Komisija.

#### Član 24.

(Pravo na životno osiguranje od posljedica nesretnog slučaja ili smrti)

Članovi Vlade imaju pravo na životno osiguranje, o čemu odlučuje Komisija.

### IV. RJEŠAVANJE O PRAVIMA I OBAVEZAMA

#### Član 25.

(Donošenje rješenja)

- (1) O pojedinačnim pravima članova Vlade i savjetnika premijera Kantona, utvrđenih ovim zakonom i drugim aktima, odlučuje rješenjem Komisija.
- (2) Protiv rješenja iz stava (1) ovog člana, može se uložiti prigovor Komisiji.
- (3) Rješenje Komisije po prigovoru je konačno.
- (4) O pojedinačnim pravima savjetnika ministra, utvrđenih ovim zakonom i drugim aktima, odlučuje rješenjem ministar.
- (5) Protiv rješenja iz stava (4) ovog člana, može se uložiti prigovor ministru.
- (6) Rješenje ministra po prigovoru je konačno.

#### Član 26.

(Primjena odgovarajućih propisa)

Za donošenje i dostavljanje rješenja iz člana 25. ovog zakona, primjenjuju se odgovarajuće odredbe zakona kojim se reguliše upravni postupak, a u pogledu rokova primjenjuju se odgovarajuće odredbe federalnog zakona kojima je regulisano rješavanje prava i obaveza državnih službenika.

#### Član 27.

(Obavljanje personalnih poslova)

Stručna služba za zajedničke poslove obavlja personalne poslove za članove Vlade i savjetnike.

### V. PRELAZNE I ZAVRŠNE ODREDBE

#### Član 28.

(Donošenje provedbenih akata)

- (1) Vlada i Komisija dužni su donijeti akte za koja su ovlašteni ovim zakonom, u roku od 60 dana od dana stupanja na snagu ovog zakona.
- (2) Akti iz stava (1) ovog člana donose se uz prethodno mišljenje Ministarstva finansija.

Član 29.

(Ravnopravnost spolova)

Gramatička terminologija u ovom zakonu podrazumijeva uključivanje oba spola.

Član 30.

(Prestanak važenja zakona)

Stupanjem na snagu ovog zakona prestaje da važi Zakon o plaćama i naknadama funkcionera iz oblasti izvršne vlasti i kantonalne uprave u Kantonu Sarajevo, službenika koje imenuje, odnosno postavlja Vlada Kantona Sarajevo i službenika koji rukovode stručnim službama ("Službene novine Kantona Sarajevo", br. 13/99 i 28/01).

Član 31.

(Stupanje na snagu Zakona)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

---

Broj 01-02-26166/08  
4. septembra 2008. godine  
Sarajevo

---

Predsjedavajući  
Skupštine Kantona Sarajevo  
dr. **Denis Zvizdić**, s. r.

---